

三通考輯要

第三
函
第十冊

皇朝文獻通考輯要卷二

山陰湯壽潛撰先恭輯

錢幣考臣等謹案自古刀布之用一變爲九府圖法厥後輕重代殊而肉好之式未之有易於以權百物之貴賤通農末之有無錢之所關誠鉅矣顧利之所在弊亦隨之錢重則姦民盜銷以牟利惜銅愛工則又以薄惡而僞鑄易興有天下者操利人之柄求酌中之宜惟在以人用法有以持其弊而已歷代錢法之得失具詳馬考及五朝續考中

太祖

太宗龍興東土創制顯庸卽已鑄有錢文以資民用逮定鼎燕京

以來

列聖相承府事允治內而寶泉寶源之設輕重協宜圖兩精好外則各省局爐座或設或停隨時

調劑而又定官司之監理以專責成分兵餉之配支以廣流布務使有遠近通行之利而無奸民翫法之弊邇者西陲底定式廓版章復頒錢式於回部各城開鑄

天朝乾隆通寶錢俾荒服之人咸昭法守斯尤大同

之至治若夫鼓鑄所需首在採銅山礦所開海航所市歲以數千百萬計若錫若鉛亦各隨所產京省諸局悉取給焉其收買有時其運輸有限權衡定制中外交資至馬氏敘錢而兼及於幣蓋古者錢亦稱幣而尙不足

以盡幣管子稱三幣而刀布爲下則凡可以通功易事利民權物者皆可以幣例之也三代以後珠玉但爲器飾而不以爲幣皮幣惟漢武一行之龜貝惟王莽一行之元明時雲南行使貳子以之折賦尙沿貝貨之遺逮

鼓鑄既興而海貳之用久廢若乃自宋以來兼用楮幣其制起於交子會子而金元明稱之曰鈔原其始亦以

鹽茶券引之屬視之而皆以權錢行之既久乃卽以當錢論者謂以虛代實民不寶貴

國家錢貨充盈無藉

乎鈔法之用故順治年間雖暫用之旋即停止則亦非今日通行之幣也夫幣之堅而可久者莫過於金金有三品或黃或白或赤而錢特居其一周制黃金方寸而重一觔國語註虞夏商周黃金爲上幣銅錢爲下幣漢書秦并天下黃金以鎰名者爲上幣銅錢識曰半兩爲下幣漢代復以觔名金用金多以千萬觔計蓋其時但以黃金爲幣若白金之用惟漢武之白選王莽之銀貨一見於史而後亦漸廢固不皆以爲幣也魏晉以後金日少而昂幣始專用錢六朝迄唐交廣之域以金銀爲幣然止限於一隅至金時鑄銀名承安寶貨公私同見錢用此以銀爲幣之始前明中葉令各處稅糧得收納白金而銀之用益廣我朝銀錢兼權一爲上下通行之幣故凡銀色之高下與銀直之輕重並附編於左

天命元年鑄天命通寶錢丙辰春正月諸貝勒等具表上

太祖尊號曰

覆育列國英明皇帝建

元天命尋開局鑄錢二品依古九府圖法制之輪郭外周錢面作字陽起一爲國書滿文一漢字曰天命通

寶其滿文一品錢質較大謹按

太祖己亥年二月始

命以滿洲語製爲

國書嗣後議開金

銀礦及鐵冶蓋五金之利已由此肇興逮建元天命以後即以滿漢字分鑄制錢迄今圖法流傳中外臣民共珍爲重寶謹依舊制首載是編仰見我朝開國之初所以裕國而利民者規模宏遠矣

天聰元年鑄天聰通寶錢時

太宗文皇帝御極改元天聰亦鑄錢二品一爲滿文一漢字曰天聰通寶

大小各如舊制

順治元年置戶部寶泉局工部寶源局鑄順治通寶錢時

世祖章皇帝定鼎燕京令置寶泉局屬於戶

部寶源局屬於工部各鼓鑄制錢文曰順治通寶用漢字每文重一錢寶泉局歲鑄錢解交戶部庫配銀給發兵餉以戶部漢右侍郎一人督理京省錢法滿漢司官各一人監督局務每年掣差設局大使一人寶源局歲鑄錢解交工部節慎庫以備給發各工之用錢法亦掣於漢右侍郎置滿漢監督官三人專司出納設局大使一人餘制與戶部同尋戶部議將順治通寶錢式頒發各省鎮有應需鼓鑄者令定議開局謹按唐宋鑄錢之所皆稱爲監元時亦稱爲司其稱爲局者仍明制也明代直省鑄局皆得稱寶泉寶源本朝惟京局稱之其開鑄之期曰卯宋以後始有寶卯點卯之名蓋取其時之早相沿既久遂以一期爲一卯至計錢之數自漢以來曰貫亦曰緡前明或以錠計每五千文爲一錠今以錢千文爲一串猶之貫緡之義云

二年定錢制每文重一錢二分先是工部侍郎葉初春以制錢每七文準銀一分錢價日增民未稱便請頒鑄當五當二錢以便民用不允至是戶部議言錢文尙輕應更舊制每文重一錢者爲一錢二分凡七文準銀一分舊錢以十四文準銀一分官以此徵收民以此輸納聽便行使從之謹按錢之輕重古以銖與銖黍計今

以錢與分釐計蓋分釐之數古者但以爲度名而不以爲權名權之爲數則十黍爲釐十釐爲銖二十四銖爲兩自太公圖法輕重以銖漢以後每以銖之數鑄於錢文唐開元通寶爲二銖四釐積十錢重一兩是每文爲今之重一錢後人以爲繁而難曉故十分其兩而代以錢字蓋宋之前已然考宋太宗淳化二年詔定稱法其

時以太府權衡但有一錢至十觔之數乃別爲新制以御書三體清化錢較定實重二銖四釐爲一錢就黍稷銖參之度尺以忽絲毫釐各積分爲一錢之則然後制取等稱新制既定中外以爲便是則十釐爲十分爲錢之計數始於宋時所謂錢者卽借錢幣之錢以爲數名所謂分釐者卽借度尺長短之名以爲輕重之名也若夫古之稱法至後世而加重隋文帝鑄五銖錢重如其文而每錢一千重四觔二兩則古稱三觔爲隋一觔而少隋書亦謂開皇以古稱三觔爲一觔孔穎達左傳正義謂周隋稱於古三而爲一杜佑通典謂六朝稱三兩當唐一兩今以古稱三之一約之則漢之五銖錢止當今七分而弱而今之重一錢二分者實爲古八銖有贏此固權法相沿之不同亦可見今之鼓鑄其不愛銅而不惜工費更勝於古焉

又令山西陝西省及密雲薊宣府大同延綏臨清等鎮各開鼓鑄局先是元年已頒發錢式至是各省鎮陸續奏請開鑄戶部議准每文照京局重一錢二分令各右布政使總理錢法委就近道府及同知通判等官分管局務

三年禁用前代舊錢戶部議定制錢漸廣舊錢應概禁不用惟崇禎錢暫行使其餘舊錢有願送部者每觔給直八分以資鼓鑄至八年以明季舊錢流行日久未能遽革復申其禁以三月爲限過三月仍舊使者罪之又申假銀及行使低銀之禁

又令湖廣省城及荊州府各開鼓鑄局

四年禁止偽錢戶部議言天下初定草竊未靖雜出偽錢且至奸民乘便盜鑄應下令禁戢從之

又令 盛京及江西河南省湖廣之常德府各開鼓鑄局

又更定錢直戶部議定制錢行使原係每七文準銀一分錢價既重小民交易不便應改爲每十文準銀一分永著爲令 謹按錢與銀相權而行欲求錢法之流通必先定錢直之高下錢無定直則鋪戶之倒換者得以操其重輕私家之居奇者得以伺其贏縮錢價無準而物價亦失其平自漢以來銀尚未爲通用之幣故銀錢相權之直前史多未及詳大抵古者金銀視後世較賤而銅錢視後世較貴漢書食貨志漢武鑄白金三品龍文白選重八兩直三千馬文直五百龜文直三百所謂白金者雜銀錫爲之既非專用真銀而其時以縣官空乏聊造以贍用不可據以爲準故重八兩者直三千而六兩四兩者止直五百三百則知當日原未嘗以白金之重與銅錢相較而平其直也新莽時黃金一觔直錢萬銀八兩爲一流朱提銀一流直錢一千五百八十他銀一流直錢千以古稱比後世三之一計之金一觔實爲今五兩有奇而直止萬銀八兩實爲今二兩八錢有奇而直止千有奇及千則漢時錢貴可見而金價但五倍於銀則以金多而易得也宋真宗嘗論咸平中金兩五千銀兩八百是金銀之直已較貴於漢自鈔法盛行而錢價益無定準金時每銀一兩折錢二貫則銀直又過昂明代錢互有貴賤每銀一錢直五十五文至百文不等又有京錢外省錢多寡之異永季至銀一兩易錢五六千文而錢法大壞我 朝定鼎之初議以銀一分爲錢七文是年更定每分爲十文以爲定例嗣後屢經

申明其令其國積官錢者有禁與販攪和小錢者有禁偶遇錢價稍昂復多方調劑以平其直務使轉移出入上握其權交易流通下收其利誠爲酌中便民之利也

五年開江南江甯府鼓鑄停 盛京及延綏鎮局戶部議言江南江甯府爲前代建都之地商賈雲集現在有滿兵分駐防守准於所在設局開鑄

六年令浙江福建山東省各開鼓鑄局 七年開湖廣襄陽鄭陽二府鼓鑄局

八年增定錢制每文重一錢二分五釐戶部議言錢爲國寶務厚且大始定制每文重一錢繼重一錢二分猶嫌其輕應每文改鑄重一錢二分五釐仍照定制以每錢百文準銀一錢從之

又行鈔貫之制是年始造鈔一十二萬八千一百七十二貫有奇自後歲以爲額至十八年卽行停止 謹按鈔法始於宋之楮幣至明代鈔以桑穰故紙爲之外爲闌紋中圖錢貫之狀並印貫例文字於其上民間僞造者有禁原以濟錢法之窮也順治初年經費未定用度浩繁是歲 世祖章皇帝親政之始先以國帑未

充 特命發內庫銀支給官俸等項嗣復倣明舊制造爲鈔貫與錢兼行蓋金元以來鈔法之弊在於錢

不勝鈔鈔旣日多錢行日少於是鈔輕物重終至繩格而法遂以窮明臣邱潛所謂鈔法不可行以用之者無權也 國初制鈔甚少其上下流通仍以銅錢故舊行之而無弊嗣後旋即停罷大抵自宋迄明於銅錢之外皆兼以鈔爲幣 本朝始專以銀爲幣夫因穀帛而權之以錢復因錢之艱於齎運而權之以幣鈔與銀皆爲

權錢而起然鈔虛而銀寶鈔易昏爛而銀可久使鈔難審析而銀可分用其得失固自判然前代恐鈔法之阻滯并銀與銅錢而禁之至於用銀者以奸惡論以錢交易者掠治其罪亦爲不揣其本末矣然則錢與幣之各得其宜固無有逾於我朝者也

又議令各布政司止各開一局餘俱停止戶部議言見在鑄局過多民易盜鑄爲好應行裁減於各布政使司駐劄之省城止留一局鼓鑄其餘各鎮及湖廣之荊州常德襄陽鄖陽府等局一概停止從之

十年復開密雲薊宣府陽和臨清等鎮鼓鑄局先因各省鎮局過多定議裁減至是以錢用日廣錢價漸昂戶部議准仍設密雲等處鑄局共增爐三百有四座

又鑄一釐字錢九卿等會議疏通錢法奏言鑄錢務照定式每文重一錢二分五釐錢背之左增鑄漢文一釐二字其右戶部鑄戶字工部鑄工字如江南江西浙江福建湖廣湖南山東山西陝西省城及密雲薊宣府陽和臨清等鎮並鑄開局地方一字須極精工鑄不合式者參究每千文准銀一兩其見行舊時制錢原有高低厚薄不等難以強齊一切貿易應暫從民便至直省錢法責成右布政使專督稽查奉 上諭錢法難行

皆因鑄造不精所致見今官錢該部酌減爐座務精工如式背添一釐三字上下通行聞向來官爐夾帶私鑄尤爲病國犯者以枉法贓論罪其私鑄奸民不時嚴緝若仍違犯並地方官究處餘悉如議行 謹按古半兩五銖等錢皆紀銅之輕重 本朝之一釐字錢則紀直銀之數者古者數名先作釐字一露所吐爲忽十忽爲

絲十絲爲毫十毫爲釐說者謂毫斷馬尾爲之釐爲龍牛尾毛蓋取自微至著之義也史記漢書多作釐後乃通用作釐其又爲厘者從省文也是年錢局幕文皆作厘

十二年定制錢配給俸餉之例戶部議言制錢日廣諸於每年二月八月以局錢半成配給官俸及兵餉其直省兵餉等項亦令以制錢按成搭放從之謹按直省開鑄地方除搭放兵餉外或兼給官役俸工驛站雜支等項視局錢之多寡隨時酌放核算報銷本無定額

又開山東萊州府鼓鑄局

十三年又移陽和局於大同改鑄錢幕陽字爲同字

十四年定直省錢糧兼收銀錢之例戶部議言直省徵納錢糧多係收銀見今錢多壅滯應上下流通請令銀錢兼收以銀七錢三爲準銀則盡數起解其錢充存留之用永爲定例從之謹按古者賦稅之制惟以穀帛

其後以錢又其後以銀漢律有口算出錢但施之丁賦而已自唐定兩稅法始以錢爲惟正之供宋代因之民間輸官之物謂之錢糧由此昉也唐以銀爲土貢而不以爲賦宋景祐時詔諸路歲輸緡錢福建二廣易以銀

於是銀始得代錢明洪武九年許民以銀錢鈔絹代輸今年租稅於是銀始得代糧正統元年以後令浙江西湖廣等處租稅俱量收銀此以銀爲賦之始國初於是年定銀七錢三之例嗣後銀錢交納仍各隨民便

雍正十一年復以民間正賦概行交銀經安徽巡撫徐本奏准凡小戶零星及大戶尾欠錢糧納銀時恐致稱

收折耗請令完納制錢每銀一分收錢十文連耗羨在內至乾隆元年又以直隸所屬州縣徵收錢糧多有以錢作銀民間交錢比納銀爲數較重 特諭凡錢糧在一錢以上者不必勒令交錢在一錢以下者仍照舊

例銀錢聽其自便云

又停各省鎮鼓鑄專歸京局更定錢制每文重一錢四分於錢幕鑄滿文戶部奉

上諭鼓鑄之法原以

裕國便民今各省開爐太多鑄造不精以致奸民乘機盜鑄錢愈多而愈賤私錢公行官錢壅滯官民兩受其病欲使錢法無弊莫若鼓鑄歸一其各省鑄爐一概停止獨令京局鼓鑄務比舊錢體質更加闊厚每文重一錢四分磨鑄精工且兼用滿漢字俾私錢難於僞作一面鑄順治通寶四漢字一面鑄寶泉二滿字其見行之錢姑准暫用俟三年後止用新鑄制錢舊錢盡行銷毀 謹案是年爲錢背鑄滿文之始尋工部局亦照式鑄

寶源二滿字考錢之爲制自古迄今遞加詳備苟悅謂夏殷以前錢無文周制則有文蓋以寶字繫錢自周景王之寶貨始以年號繫錢自宋孝武之孝建錢始以通寶字繫錢自唐之開元錢始但武德鑄開元錢原取迴環可讀亦得稱開通錢其專稱通寶者實自唐之建中通寶始至錢背之繫以地名則自唐會昌時之開元錢始厥後或有繫以開鑄年數者或有繫以當五當十數者至 本朝始定鑄在京局名及直省地名焉若夫錢之有面有背古錢皆一面有字一面無字昔人以無字處爲面爲陽有字處爲背爲陰謂如器物款識必書於底其實不然考漢書稱錢之面背又作文與幕苟悅以幕爲漫而無文韋昭曰幕錢背也則無文字處之爲背

自古已然惟是古錢有字之面但紀銖兩之輕重至宋孝建四銖錢兼紀年號於是兩面皆有字唐宋以來皆紀年號而不紀銖兩遂以通寶之文爲面此則古今稱號之各隨其宜也

定私鑄銅錢禁例 謹按錢之禁例事屬刑制而其隨時輕重所以維持錢法故前考亦見錢幣門考私鑄原律爲首及匠人縱候爲從及知情買使者各減一等至是年更定其例十八年復申其舊例加嚴定攬和行使舊錢廢錢禁例

十七年復開各省鎮鼓鑄增置雲南省局定錢幕兼鑄地名滿漢文時定各局錢背分鑄地名江南江甯府局鑄甯字江西南昌府局鑄江字浙江杭州府局鑄浙字福建福州府局鑄福字湖廣武昌府局鑄昌字河南開封府局鑄河字山東濟南府局鑄東字山西太原府局鑄原字陝西西安府局鑄陝字密雲鎮局鑄密字薊鎮局鑄薊字宣府鎮局鑄宣字大同鎮局鑄同字臨清鎮局鑄臨字並增置雲南之雲南府局鑄雲字皆滿漢文各一滿文在左漢文在右每文俱重一錢四分惟京局之寶泉寶源字俱用滿文 謹按順治十年所鑄一盤錢幕漢字地名惟江南江甯作江字江西南昌作昌字湖廣武昌作武字餘俱與是年所鑄字同

又定工部寶源局監督差滿漢司官各一人增設筆帖式一人皆一年期滿更代

十八年議收毀舊鑄無一盤字制錢先是順治十年於錢背鑄一盤二字其舊行無一盤字錢暫從民便十四年復定錢文兼用滿字其舊錢俟三年後盡行銷毀至是以三年限滿戶部請言見在各局滿漢文新錢鑄造

尙少其一釐字錢暫令展限行使請先收買十年以前無一釐字錢每觔給直七分交局銷毀改鑄從之
又議收買私錢及舊錢廢錢山東道御史余同仁疏言頃者禁止私鑄及明季之舊錢廢錢立法甚嚴但此等
錢積聚民間者不可勝數今禁止攪和行使而未講求收買變通之方請於京師並直隸各省地方立法收
買俾民無所行使則攪和者自息下部知之

原十
三

康熙元年頒行康熙通寶錢

二年議收毀一釐字制錢先是順治十八年議將銷毀一釐字錢之例暫展限二年行使至是復展限期戶工
二部奏定各撥銀收買每觔給直六分發錢局改鑄新錢其工部收買銀兩令暫停本年各關採辦寶源局銅
卽將額銀先行解部聽候撥用

六年復開各省鑄鼓鑄增置湖南江蘇甘肅省局時以浙江總督趙廷臣疏言直省爐座應仍令照舊鼓鑄以
裕國儲而濟民用經戶部議准除見存之江甯局外其餘各省鎮依順治十七年之例通行開局照式鑄地
名滿漢文並增置湖南等局其錢幕湖南長沙府局鑄南字江蘇蘇州府局鑄蘇字甘肅鞏昌府局鑄鞏字
七年令四川廣東廣西貴州省各開鼓鑄局戶部疏言湖南等處俱已開鑄惟四川等省原未設局應令各督
撫詳查定議等俱奏請開爐其錢幕滿漢文四川成都府局鑄川字廣東廣州府局鑄廣字廣西桂林府局鑄
桂字貴州貴陽府局鑄貴字

九年停江甯蘇州江西福建湖北湖南河南山東山西陝西甘肅廣東廣西雲南貴州四川鼓鑄時以四川巡撫張德地疏言四川僻處邊地州縣本無存留錢糧而陸路有棧道之艱水路有川江之險若令銀錢兼徵則起解腳費恐致累民見在無需錢文之用請停鼓鑄經戶部議應如所請其江甯等十五布政使司均恐有需錢非急之處開鑄以來官錢既多或致壅滯亦應行查議停得旨俱暫行停止

十年停密雲箭宣府大同鎮鼓鑄

十二年定私銷制錢禁例四川道御史羅人傑疏言奸民銷毀制錢造作銅器應行禁止經九卿議定銅價所在高昂而毀千錢已可得銅八觔有餘銅價浮於錢價直可獲利以倍非嚴立科條不能禁其不毀制錢也私銷之罪同於私鑄嗣後有犯者照私鑄例論罪官員失察亦如之

十三年停浙江鼓鑄

十四年定開採銅鉛之例戶部議准凡各省產銅及白黑鉛處所有民具呈願採該督撫卽委官監管採取至十八年復定各省採銅鉛處令道員總理府佐分管州縣官專司採得銅鉛以十分內二分納官八分聽民發賣有不便採取之處督撫題明停止監管官所得稅銅鉛准按勛數議敘上官誅求逼勒者從重議處其採取銅鉛先聽地主報名如地主無力聽本州縣人報採許雇鄰近州縣匠役如有越境採取及衙役擾民俱治其罪謹按嗣後各省銅鉛之廠視山礦之旺衰或開或閉隨地隨時初無一定康熙年間如盛京及閩浙諸

省皆曾開採續經停止今則雲南貴州湖南四川廣西廣東等處並饒礦產而滇之紅銅及黔楚之鉛粵東之點錫尤其上供京局者也開廠之例亦陸續增定大抵聽商民自爲採取而官爲監之稅其十分之二其四分則發價官收四分則聽其流通販運或以一成抽課其餘盡數官買或以三成抽課其餘聽商自賣亦有官發工本招商承辦又有竟歸官辦者其額有增減價有重輕皆隨各省見在情形斟酌辦理沿革具詳徵權考之坑冶門茲不複載

停臨清鎮鼓鑄

十五年定工部寶源局監督不論滿漢止差司官一人

十八年議定戶部寶泉局工部寶源局俱令滿右侍郎一人公同漢侍郎督理錢法

又行解送廢銅之令奉

上諭今聞錢法漸弛鼓鑄滋弊以致制錢日少價直騰貴著戶部工部都察院

堂官同詣錢局親查盤剝弊端至部院衙門各處所有廢銅器皿及廢紅衣大小銅礮並直省所存廢銅礮著盡行解部鼓鑄尋議各關差承辦兩局銅舫聽買廢銅舊器解送或將紅銅六十舫鉛四十舫折作銅一百舫不得攙和板塊之銅以絕毀錢之弊至二十四年復議不拘板塊及廢銅准其一體解送

十九年議派滿漢科道官各一人稽察錢局一年更代

又開福建漳州府鼓鑄局錢幕鑄滿漢文漳字二十一年停

二十一年復開雲南省城鼓鑄增置大理府祿豐縣蒙自縣局錢幕俱鑄雲字

二十二年議減臨清關辦寶泉局銅銀萬兩改令贛關太平橋關承辦並增湖口鳳陽關辦銅之令 謹按康

熙二十一年移九江關於湖口縣故亦稱湖口關至雍正元年仍還九江

二十三年選差專員督理京省錢法

又更定錢制每文重一錢令寶泉局每年開鑄四十卯管理錢法吏部左侍郎陳廷敬疏言民間所不便者莫甚於錢價昂貴定制每錢一千直銀一兩今每銀一兩僅得錢八九百文錢日少而貴者蓋因奸宄不法毀錢作銅牟利所致鼓鑄之數有限銷毀之途無窮錢安得不貴乎欲除毀錢之弊求制錢之多莫若鑄稍輕之錢毀錢爲銅既無厚利則其弊自絕

又定以銅六鉛四配鑄制錢 謹按鑄錢之法兼用銅鉛蓋銅性燥烈必以鉛濟之而後錢始光潤唐錢已用銅鉛錫配鑄故開元時曾禁以銅爲器及私賣銅鉛錫又宋史稱轉運使張齊賢求舊鑄法惟永平監用開元錢料最善卽詣闕面陳詔增市鉛錫明代錢分別四火黃銅二火黃銅配鑄所謂黃銅者卽紅銅與白鉛相和而成蓋其法相傳已久 國初鑄錢或聽各關於銅額內兼辦鉛觔或收用廢錢舊器分別生熟銅配鑄至是始酌定成數是年若湖南省嗣後若福建廣東湖北浙江等省開局皆令照例配鑄惟雲南鑄局是時以本地及貴州等處鉛礦俱未開採銅賤鉛貴銅價每觔五分四釐鉛價每觔五分五釐准以銅八鉛二配鑄

又申定兩局爐役夾鑄私錢之禁

二十四年罷前代舊錢之禁福建巡撫金鉉疏言福建錢文頗雜所轄州縣多用前代舊錢應爲禁遏經戶部議准一切舊錢悉行銷毀

上復以問內閣諸臣時內閣學士徐乾學議言自古皆古今錢相兼行使以從民便考梁太平元年詔雜用古今錢宋泰始二年斷新錢專用古錢魏熙平初任城王澄上言請以太和錢與新鑄五銖及諸古錢並得通行金大定十九年以宋大觀錢一當五用之明太祖寶錄辛丑歲二月置寶源局於應天府鑄大中通寶錢與歷代錢相兼行使嘉靖十五年御史閻隣等言國朝所用錢幣有二曰制錢如洪武永樂等通寶是也曰舊錢如開元太平淳化祥符等錢是也百六十年來二錢並用民咸利之以臣所聞歷歷如是大抵錢者歷代通行之貨金志謂之自古流行之寶自漢五銖以來未有廢古而專用今者若隋時盡銷古錢明天啟以後廣興鑄局盡括古錢以充廢銅此錢之變也昔時錢法之弊至於鵝眼綆環之類無代不有然歷代之錢尙存旬日之間便可澄汰至舊錢已盡即使良工更鑄而海內之廣一時難徧欲一市價而裕民財爲稍難矣故自古雖易姓革命而古錢仍舊流通錢亦不壅況於閩處嶺外貢山鄰海非同內地聽從民兼用古錢似爲至便奉

上諭舊錢流布不止福建一省他省亦皆有之若驟爲禁止恐不肖之徒借端生事貽害平民亦未可定所奏銷毀不准行

又開雲南臨安府鼓鑄局錢幕亦鑄雲字

二十五年復開廣東省城鼓鑄增置肇慶府局錢幕亦鑄廣字

二十六年復開湖北鼓鑄停廣東肇慶府局

二十七年定工部鑄源局監督仍差滿漢司官各一人

二十八年開福建臺灣府鼓鑄局錢幕鑄滿漢文臺字福建巡撫張仲舉疏言臺灣孤懸海外自建設郡縣以來民間猶用偽錢應請頒發制錢式樣就本地開爐鼓鑄其銅本就兵餉銀內動用購買鑄模制錢歸還原項戶部議如所請從之

又停雲南省各局鼓鑄雲南各局舊共設爐四十八座後以錢價過賤已議裁爐二十四座至是總督范承勳復以錢法壅滯請將雲南省城祿豐縣臨安府城蒙自縣大理府城五局概行停止俟積錢疏通完日再議開鑄從之

二十九年申定錢直不平禁例戶部議言官局制錢順治年間卽定每十文準銀一分近因錢市居奇而價復參差不一自今市肆交易務照定例每銀一兩毋得不足千文之數違者旗人鞭一百民人杖一百各枷一月

互詳
刑考

三十一年停廣東及福建臺灣府鼓鑄

三十三年令寶泉局每年開鑄三十六卯每卯用銅鉛五萬觔